

欽定古今圖書集成

方輿彙編職方典



欽定古今圖書集成方輿彙編職方典

第六百八十九卷目錄

松江府部彙考一

松江府建置沿革考

松江府疆域考

有圖

形勝附

松江府星野考

松江府山川考一

松江府建置沿革考一
本府
通志

職方典第六百八十九卷

松江府部彙考一

松江府建置沿革考

本府

通志

禹貢揚州之域春秋屬吳吳亡入越後入楚秦
為會稽郡婁縣地漢因之東漢屬吳郡孫吳晉
宋齊皆因之梁置信義郡省婁縣入焉尋析婁
地為崑山縣信義廢仍屬吳郡郡於陳為吳州
隋為蘇州大業初復為吳郡而縣隸如故梁時

置前京胥浦二縣至隋皆廢唐天寶中析嘉興地置華亭縣屬蘇州五代吳越隸中吳府後置秀州以華亭屬之宋改秀州為嘉禾郡又改為嘉興府華亭為屬邑元先隸嘉興路至元間陞華亭縣為華亭府後改為松江府以府北有松江故名轄華亭後置上海縣隸江南浙西道明因之嘉靖中置青浦屬南直隸領三縣

皇清因之順治十三年析華亭地置婁縣隸江南省江蘇布政司領縣四

華亭縣 附郭

秦漢婁東南境海鹽北境屬會稽郡三國孫吳封陸遜為華亭侯華亭之名始此南北朝崑山境隋如故唐天寶間析嘉興地置華亭縣屬蘇州移崑山縣治於馬鞍山五代屬秀州宋屬嘉興府元陞華亭府後罷立都水庸田司復罷改松江府縣屬之如舊明松江府治

皇清因之編戶八百一十一里後分其地為婁縣今止編戶三百三十一里

婁縣 附郭

秦置婁縣漢三國晉東晉南北朝宋齊俱因之
梁析為崑山婁廢陳隋皆崑山地唐五代宋元
明皆為華亭地

皇清順治十三年析華亭地為婁縣編戶三百五十
里

上海縣

秦海鹽北境漢三國晉俱因之南北朝梁陳為
前京縣地唐華亭縣地居海之上洋舊曰華亭

海宋商販聚集名上海市置上海市舶司元分
華亭東北五鄉立上海縣屬松江府明因之
皇清因之編戶四百九里

青浦縣

秦漢三國晉東晉宋齊俱婁縣境梁析為崑山
境陳隋俱因之唐為華亭地五代宋元以青龍
鎮市舶司屬上海明嘉靖間立青浦縣旋罷萬
曆初復立屬松江府

皇清因之編戶二百四十六里

大海界



松江府疆域考

府志

本府

東至大海一百里

西至蘇州府長洲縣界六十里

南至金山衛濱海七十二里

北至蘇州府崑山縣界八十里

東南至青村千戶所濱海一百一十里

東北至蘇州府嘉定縣一百八里

西南至浙江嘉興府嘉善縣界二十七里

西北至蘇州府崑山縣界八十里

自府至省城八百里至

京師三千八百二十五里

東西廣一百六十里南北袤一百五十二里

華亭縣

華亭附邑也東至語兒涇上海縣界一十八里

西與婁縣分界

南至金山衛濱海七十二里

北至五里塘婁縣界五里

東南至青村所一百一十里

東北至七寶鎮上海縣界五十四里

西南與婁縣分界

西北至二里涇與婁縣分界

東西廣七十八里南北袤八十一里

婁縣

婁縣亦附邑也東與華亭縣分界

西至泖湖青浦縣界一十八里

南至金山衛七十二里

北至塘橋青浦縣一十五里

東南與華亭縣分界

東北至七寶鎮上海縣界五十四里

西南至楓涇鎮浙江嘉善縣界四十五里

西北至鍾賈山青浦縣界二十七里

上海縣

府東北九十里為上海東至川沙堡濱海五十里

西至七寶鎮青浦縣界三十六里

南至閔行鎮華亭縣界七十二里

北至柵橋嘉定縣界一十八里

東南至南匯所華亭縣界八十里

東北至吳淞所嘉定縣界一十八里

西南至莘莊鎮華亭縣界三十六里

西北至蟠龍塘青浦縣界五十四里

東西廣八十六里南北袤九十里

青浦縣

府西北五十四里為青浦東至七寶鎮上海縣

界五十四里至上海縣九十里

西至澱山湖長洲縣界五十二里至蘇州府一

百二十里

南至鳳凰山東婁縣界二十里至婁縣五十五里

北至白鶴江嘉定縣界三十五里至嘉定縣七十里

東南至泗涇婁縣界四十里

東北至楊林寺嘉定縣五十四里至上海縣界

六十里至嘉定縣南翔鎮七十二里

西南至金澤鎮吳縣界四十五里至吳江縣九

十里至四十一保二區嘉善縣界四十里至嘉

善縣七十里

東西廣九十五里南北袤七十里

形勝附

本府 華亭縣婁縣附郭

宋史大海環其東南長泖繞乎西北

地輿記瀕江重地

宋魏了翁學記負海枕江平疇沃野

元史沙全傳瀕海重地

松江圖經川流繡錯則壤稱腴

水利考水國之勝七郡關鍵

通志後辰九峯前襟黃浦

舊志府稱澤國以九峯勝

府志後辰九峯前襟黃浦大海環其東南長泖

繞乎西北蓋一都會云

上海縣 大海環其東南三江遶乎西北

青浦縣 面峙九峯背枕吳淞右襟三泖左連

滬瀆川澤沃衍商賈輻輳山川靈秀獨冠他邑

科第日盛文章行誼代有傳人

松江府星野考

府志

府屬總

史記天官書吳楚之疆候在熒惑

周禮保章氏註斗牛女屬揚州

漢張衡云吳越會稽揚州入牛一度

蔡邕云斗六度至須女二度為星紀

晉天文志自南斗十二度至須女七度為星紀

吳越之分野

宋天文志天市東垣南第六星曰吳越

石氏星經斗星七其杓上衡下爲權主吳分野
明桑悅云須女虛危元枵也青州分野自濟達
河其象爲天津絕雲漢之陽而岱宗爲十二諸
侯之府比於星紀與吳越同占南斗牽牛星紀
也吳越揚州分野南斗在雲漢下流當淮海間
爲吳分牽牛去南河浸遠自豫章迄會稽南粵
嶺徼爲越分蘇松吳地屬於南斗無疑

舊志春秋緯文耀鉤曰蒙山以東至於南江會
稽震澤徐揚之間之州屬權吳所直連跨數州

松實吳地是知天文之權星乃吳分野矣

上海縣志松郡屬南斗於辰爲丑而西學家又
以海邑直二十五度

青浦縣志青浦析壤在松西北吳之東南越之
正北則分星可類推矣第南斗牽牛星紀也直
天漢下流亦當淮海間爲吳分邑居澤國正中
上應天漢末尾得其斗氣居多故人文輩出實
雲漢昭回之助

松江府山川考一
志云
金山
周康王嘗於此築城其北即古之海鹽縣後淪於水山有平坡可二十人坐其北有寒穴周康王東游築城南接金山曰金山城去城十里許當潮勢奔猛處有周公墩蓋古人所築以防海者每歲武臣率兵入山巡邏海寇謂之按山寧紹諸州漁人多棲泊其間

松江府山川考一

府志

本府

華亭縣婁縣附郭

金山 在府東南海水中舊志云去府九十里

周康王嘗於此築城其北即古之海鹽縣後淪

於水山有平坡可二十人坐其北有寒穴周康

王東游築城南接金山曰金山城去城十里許

當潮勢奔猛處有周公墩蓋古人所築以防海

者每歲武臣率兵入山巡邏海寇謂之按山寧

紹諸州漁人多棲泊其間

小金山 疑在海中楊維禎云予嘗北渡揚子訪金山之勝而不知淞之南又有所謂大金小金出沒於雲海之中如壺嶠之在弱水外也

城山 舊經云山狀周環如城因名又云城山高八十丈與佘山等或說干山後一支北引曰繩山俗傳天馬韁也吳音繩與城同疑城山或因此而誤或曰佘山前一支迴繞若牆疑是許山 一名焦山在金山東距衛五十八里

浮山 按明一統志在府城東南一百里海中

勝山 在金山西松郡前志有浮山而勝山不載或云一山而異名耳

竹嶼山 距衛東南七十八里在許山左

達岸山 按明一統志在府城東南一百六十里海中

查山 在張堰南稍東去秦山十餘里舊名遮集仙外傳云查玉成鍊丹海上小山中今山臨海上有浴丹井而鄉名又曰僊山其當爲查無疑也

崑山 府西北二十三里長谷之東陸氏之先
葬此後機雲兄弟有辭學人以為玉出崑岡因
名山形圓秀而潤旁無附麗望之如覆盎然蘇
縣名崑山義取乎此因其地有馬鞍山俗誤為
崑松人遂以小崑自名其實非也潘尼贈陸機
詩云崑山何有有瑤有珉穆穆伊人南國之紀
則名已在機雲前矣從西北攀躋而上有閣宏
敞可眺泖湖其半有讀書臺婉變草堂白駒泉
僧供二陸主於佛殿之西軒其巔為泗州塔院

三聖閣下瞰大泖在几席間梵燈漁火隱現於
蒼煙杳渺中茲山兼以水勝也

機山 在府城西北二十里以陸士衡得名山
下有平原村亦以機為平原內史故也前有陂
澤人家散布汀岸隱然若圖書圖經云崑山之
北又有機雲兩山以弟兄得名

干山 在府城北二十九里機山東有水紆迴
從橫雲來經山下北去郡諸山之最高大者以
形如天馬稱為天馬山或傳干將會此鑄劍又

舊圖經云有干姓者居此圓智寺記亦謂山後皆干氏所有故名山上多琳宮梵宇春時遊人甚盛畫船鼓吹遙從綠野細水中來纚纚不絕嶽祠之側有來鶴軒其西穿堂當小山石壁若屏障然右瞰泖湖一白萬頃山頂有雙石魚相傳風雨化去其脇有泉遊人掬以頰面云能明目有二陸草堂在圓智寺爲士衡讀書處山有雙松臺餐霞館有浮圖七級登覽者極江海之觀故稱干山爲九峯之甲云

秦山 在張堰鎮西俗呼爲秦望謂始皇曾登此望海故名按嘉禾志寰宇記海鹽崑山俱有秦望山亦謂之秦佳又載秦皇馳道在華亭崑山南按三邑封境鄰接諸山相望不百里以馳道參之豈祖龍俱嘗駐蹕而有斯傳乎山之陽有仙人洞外僅容趾內轉深黑嘗有秉燧入者行漸寬廣未及半燧而返其巔生異草取藏笥中久而沐以湯鮮翠如生因名長生草

柘山 在府南六十五里柘湖中山生柘樹因

名旁有石其狀如牛

蘇山 距衛八十八里

洋山 一作羊山已上七山皆在海中見於府圖而羊尤大海舶時或至焉

大海 環府之東南二境淞江與黃浦會而入焉其會處曰蹠口其南與紹興寧波相望者老云深夜籟寂時越中鷄犬之聲相聞今天日晴明南岸諸山皆歷歷可指

松江 禹貢三江之一卽笠澤在府北上海縣

界府因以名舊名吳淞江後以水災去水亦曰

松陵江其源出太湖東注於海水經云松江自

湖東北逕七十里分流謂之三江口一說吳松

江口白鶴江口青龍江口謂之三江口地勢低

於震澤三丈潮水來時到震澤底定所以謂之

平江庾仲初揚都賦注云松江下七十里水口

分流東北入海爲婁江東南入海爲東江并松

江爲三江今松江自吳江長橋東流至尹山北

流至甫里東北流至澱山北合趙屯浦又東合

大盈浦又東合顧會浦又東合淞子浦盤龍浦凡五大浦至宋家橋轉東南流與黃浦會而入海自湖至海凡五匯四十二灣乃江潮與湖水相會合之地也古云九里爲一灣一灣低一尺二百四十里到三江口三百六十里到大海其將入海處別名滬瀆其別派自吳江分流由急水港鍾爲大湖曰薛澱

三江 吳淞江婁江東江也一自太湖從吳縣鮎魚口北入運河經郡城婁門東流入上下雉

瀆合新洋江經太倉塘入海者爲婁江一自太湖從吳江縣長橋東北合龐山湖入長洲界過大姚浦抵崑山界分爲二南爲吳淞江一自北爲勦娘江復合爲一東流入嘉定界經上海合黃浦東入海者爲吳淞江一自白蜆江過澱山湖東至華亭由黃浦經上海宋家港合吳淞江北入海者爲東江

舊西湖 按舊志西湖在府西南二里周圍三里爲晉陸氏養魚池方輿勝覽云陸瑁池故一

名瑁湖東有灘曰唳鶴鶴飲此水其聲則清宋
爲放生池其北渚有風月堂湖光亭中洲有環
碧亭思吳堂泳波亭元知府張之翰卽泳波故
址立西湖書院縣丞魏雲翼復爲亭於唳鶴灘
仍榜曰環碧方是時爲郡城第一勝處其後開
江造閘東流勢緩潮沙日湮不半載間遂爲平
陸通舟楫者僅一小溝及張士誠築郡城遺跡
遂廢在外者疏爲城壕惟超果寺後有陂澤潏
繞南出石梁跨之曰湖橋其北有谷水道院者

猶髣髴焉在內者所存惟此昔之勝槩無復可
尋矣前志云西湖卽谷水祥符圖經云谷水在
縣南長一百五十步中有五色泉相傳葛穉川
煉丹湖上丹成投水中後常湧泉作五色續志
云湖有漩渦甚急小舟經者或沉焉沉而出者
舐所濡甘如飴謂其下甚深寒若冰雪

小湖 前志云在西湖北今谷陽門內德風橋
南有陂澤抱費千戶宅西南匯於城下疑小湖
遺跡也東南行入合掌橋曰田家灣

日月河 相傳在普照寺南雲間占識云日月河通出狀元明成化乙巳丙午間知府樊瑩議疏通之而莫適所指乃奮曰吾徧城中水鑿之將必有合遂鑿之未幾而錢福果狀元及第今鶴城書院西有月河橋東有水從市河南行遂西轉而北出橋下灣環如半月普照寺東有水從市河南行折而東過周文襄祠至清河橋北行復合於市河一水自文襄祠後歷開禧橋橫亘之其形如日字後河復淤萬曆庚子郡守許

維新濬之辛丑張以誠狀元及第

倉河 在普照寺後按普照古錄云寺址北至居士橋荒涼草莽俗呼草路裏吳越武肅王遣司空張瑗鎮華亭寺僧待以蔬食張領之密啓武肅王乃於寺後鑿河三今軍儲北倉在其陽故名西南過豐樂橋東絕通波塘與丘家灣水合

通波塘 自府西中亭橋下北流至通波門秀州塘諸水從西來會之遂北爲顧會浦

丘家灣 循府後牆東南行出東亭橋與米市橋莊老橋二水合流出東門

玉帶河 橫貫府學中當尊經閣後魁星樓之南如腰帶然故名其源自仙鶴觀西北行轉而東與集仙門水合

牛市涇 在玉帶河北西通徐家橋東至龍門寺東城下舊自此出牛市橋南流與官紹塘合其後橋爲城基中絕爲二在城外者別名朱家浜拱秀橋跨其上

施家澆 舊志云延慶寺基本施家澆又曰施家匯乃澆之回合處則今寺前及左右河渠通東南二門者皆澆之遺迹也

龍淵 在府南龍門寺東舊志云龍淵積水大旱不竭今爲平陸自舊西湖至此爲城中之水米市塘 自東泖港口北流絕瓜涇塘過蘆涇歷黃耳祠北與張涇合遂別而東北流出米市塘橋俗呼小張涇橋合城河東流入南水門至望仙橋而東又北至米市橋與丘家灣東門水

合泖港之南爲鄉界涇

新運鹽河 自金山衛城北流經張堰鎮西爲

張涇過前後岡塘高蔣涇廟涇泖港從詹家匯
出瓜涇塘遂絕而北接駱家浜爲合塘涇爲蘆
涇東北與米市塘接折而北至張涇橋與城河
接共長六十三里凡西南諸水皆由之以入於
浦

運鹽河 有二其一自青村鹽倉北流納百曲
港蘆溝諸水爲橫涇爲蒲撻涇西合倪家灣由

岡涇塘出浦自蒲撻涇北爲魯家匯由閘港出
浦衛家溝邵宅港並在其東其一自下沙場東
循海塘北行以通諸團鹽運其北至青浦止

三泖 在府城西南三十六里廣韻注泖華亭
水也吳郡圖經云泖在華亭境有上中下三名
狹者且八十丈祥符圖經谷泖縣西三十五里
周一頃三十九畝古泖在縣西四十里周四頃
三十九畝今泖之界西北抵山涇南自泖橋出
東南至廣陳又東至當湖又東至捍海塘而止

俗傳近山涇者為上柳近柳橋者為下柳縣圖以近山涇柳益圓曰團柳近柳橋柳益闊曰大柳自柳橋而上縈繞百餘里曰長柳此三柳之異也或併胥顧謝家二柳為三柳按二柳在縣東南一陂澤耳與三柳相望七十里其說非也陸機對晉武云三柳冬溫夏涼谷水在其北金澤章練小蒸大蒸白牛諸塘在其西葑澳走馬諸塘在其東柳橋之外橫絕而東者秀州塘也五里塘 在顧會浦東二里涇東流與洞涇合

祥澤塘 在五里塘北自顧會浦分支東流北由玉皇閣與崧子浦合遂為泗涇集賢涇 在通波門東自城壕分支北流經郡厲壇後東合於洞涇其北五里塘也官紹塘 在府城南水關外受城河及斜涇諸水南行過呂巷普濟二橋又過南倉演武場丘涇又東過御史涇合柳涇入浦明萬曆七年潮沙淤淀因加濬深闊一支分流南行過打鐵橋入黃浦為小官紹塘亦旋開旋塞

御史涇 在府東南二里一名馭駟涇首起南
俞塘明星橋下其北爲斜塘明萬曆七年重濬
涇 在東門外御史涇東其北口斜連華陽
港南流合官紹塘入黃浦絕浦而南經化成寺
古胥顧涇也涇以是名引鹽鐵蟠龍南北俞塘
諸水南行合官紹塘入黃浦水勢壯駛明萬曆
五年壩截涇涇北口而蟠龍俞塘諸水並繇鹽
鐵塘行今北口復開而鹽鐵等塘漸淤淺矣
南俞塘 自府東門張塔橋南東流過三里汀

至呂塘廟南入鹽鐵自呂塘分流東南爲語兒
涇入於黃浦華亭上海於此分界北通胡婆涇
其南爲荷涇又東爲吳會鎮自荷涇東流爲菱
門塘至竹岡東南爲陸道浜入於黃浦

北俞塘 自府東門楊賣柴橋東流絕洞涇過
張涇盤龍駟馬紫岡塘貫沙竹岡橫灤新涇東
入於黃浦諺云雖得珠千斛不賣俞塘北

鹽鐵塘 在涇涇東南長三十里至葉謝北達
太倉江陰入江世傳吳越王於此運鐵故名自

呂塘廟迤南入黃浦淤壅不通明萬曆六年疏
濬深闊截浦而南抵曹涇之捍海塘而止

從令涇 在橫濼東其南通上下橫涇曰柘瀝
塘至捍海塘止北流入浦隔浦與鶯竇湖對

洞涇 自張塔橋北行貫北俞塘入泗涇
北張涇 在洞涇東其南接俞塘北入於泗涇

其東卽盤龍塘也

柘湖 在府南六十五里吳地記云周圍五千
一百十九頃中有小山生柘樹故湖山皆以柘

名吳越春秋秦海鹽縣淪沒爲柘湖移於武原
復陷爲當湖一說王莽時改名展武復陷爲湖
晉隆安五年孫恩北出海鹽宋武帝築城於故
海鹽恩知不可下進攻滬瀆則晉嘗築城於此
矣錢氏有國浚柘湖及新涇塘由小官浦入海
則五代時湖當通海後漸涇塞僅餘積水若陂
澤然以今觀之凡查山之西北張堰之東南黃
茅白葦之場皆其地也

金山港 在柘湖東十二里上有金山營又東

十二里爲菊花港一名胡家港又東北五十里
曰蔡廟港俱護塘外

徐浦塘 自舊運鹽河分支東行草蕩間歷浦
東塲曹涇市至滌闕閘止其南通海支渠曰胡
家港曰金山港曰菊花港曰曹涇港

高家涇 自張堰東護塘下北流爲後涇爲黃
泥漚西入於張涇其東爲白茅涇又東爲沈湖
涇又東爲洮港白茅自護塘北流過前岡爲潘
涇至橫涇止白茅涇之西爲黃墳涇東通洮港

西合後涇北流至後岡止

沈湖涇

洮港

俱自護塘北流至前岡止

其水自胥浦塘北來又西北爲楊樹漚吳塔涇
俱北入吳家溜東爲界涇北爲趙巷港奉賢涇
東爲招賢涇又東爲龍泉港北通運港由亭林
鎮前東入鹽鐵塘東北爲得勝港入於黃浦

顧胥塘

自白茅涇東流絕沈湖洮港爲善涇

至奉賢涇北爲上橫涇其西北爲前岡塘

爛涇

西承長泖張涇諸水東入米市塘爲宣

洩要道朱涇在其西北張宅在其東南

奉賢涇 在洮港東北流入運港其西為新港

北入善涇逶迤西北行為楊樹澗為吳塔涇至

亭林與運港合北入方西塘善涇之北為何家

溜東為界涇又北為鹽河為趙巷港東為下橫

涇前志云其闊十丈

招賢涇 在奉賢涇東闊九丈五尺

龍泉港 一作龍船港在招賢涇東北通運港

鹽河 在界涇北東流入鹽鐵塘

上橫涇 在亭林鎮南自奉賢涇東流絕鹽鐵

塘而東歷胡家橋至柘林市東入柘澀塘

下橫涇 在上橫涇北自奉賢涇東流過法華

橋東南入胡家橋與柘澀塘合其一支承鹽鐵

塘西接洋涇西北通爛涇入黃浦

運港 自亭林鎮東流入鹽鐵塘北折為白龍

潭吳衝涇東北通葉謝鎮

方西塘 自亭林西北流為祝家港東北入鹽

鐵塘西通洋涇西北通爛涇北流為泖涇東北

流入瓜涇塘與大柳涇對俗呼爲斜涇

淺沙塘 在下橫涇北西通鹽鐵塘東流爲舊

涇過沙岡爲新塘過滌缺入金匯塘止

南橋塘 在淺沙塘北東流過沙竹岡橫灤從

令涇金匯塘東通青村港自沙岡西北流爲蘆

涇爲姚涇遂爲巨漕

巨漕 在南塘橋北自萬年涇絕黃浦而北至

六磊塘止其一支從姚涇而西入千步涇

望湖涇 在南橋北東入千步涇北入黃浦其

北爲蔣家浜秋巷涇洞涇其南爲俞江塘

俞江塘 今名俞涇塘自漕涇北流絕上下橫

涇與鹽鐵塘合北入望湖涇

蕭塘港 在蔣家浜北自葉謝鎮東流入金匯

塘其上有寺曰崇福宋狀元衛涇生於此其支

渠北流爲新涇長漚清水港東爲顧莊塘

百曲港 自金匯塘東流其南爲車溝塘入郭

家塘北爲雪塔港又北爲蘆溝爲庵港並東入

運鹽河港曲折最多因名其上有曲水村

和尚塘 起捍海塘西北流東通陸江塘及青
村港西流入金匯塘自界涇至此爲風涇以南
循海而東北流入浦之水

小清河 在秀野橋之東循西林寺東垣北入
白龍潭

白龍潭 在府城谷陽門外坊後柵橋西其南
通小清河北通二里涇東出與城河合潭廣可
十餘頃相傳有龍蟄其下水深而清可瀾可釀
歲旱禱之有應今爲商民所侵已去潭之半矣

然花晨月夕尚有遊人簫鼓畫船歲時不絕端
午龍舟水嬉士女猶集於此

採花涇 南接城壕北通二里涇其東北花園
也有夜遊涇相傳陸氏自園泛舟夜遊於此

前岡塘 自張涇接胥浦塘東流絕黃墳涇至
白茅涇折北而東至亭林入方西塘其西一支
斜入張涇曰丫叉涇其東自沈湖涇東北流爲
千步涇過蕩涇爲褚石涇過廟涇爲吳家溜爲
小官紹塘北入瓜涇塘

後岡塘 西接橫塘東流至亭林與前岡塘合
橫涇 入小官紹塘南爲盛家灣東北爲張蕩
北爲鄉界涇米市塘明萬曆五年浚
高蔣涇 自張涇東流過松隱寺北流爲鄉界
涇爲米市塘東北爲蓮花朶與廟涇俱入小官
紹塘蓮花朶之南爲南陽涇北爲中洋涇又北
爲北洋涇並東流南入方西塘北入祝家港遂
入黃浦舊圖有洋湖在胥顧謝家泖之南今化
成庵在洋涇北疑涇卽湖之遺跡也

泖港 自張涇東流過東西積錢港絕米市塘
爲東泖港斜入小官紹塘一名斜涇米市塘西
南卽盛家灣斜涇盡處一水通廟涇爲古謝泖
爛涇在其南

盛家灣 東北爲張蕩厥田最下遇旱乃收
瓜涇塘 在郡南九里西承橫潦涇南承米市
塘北受詹家匯以北諸水入於黃浦

西山涇 在葑澳東崑山橫雲之間南通古浦
塘過崑山絕走馬塘過橫雲絕秀溪塘北入曹

港入港處又名竹管涇

東山涇 其南至與西山涇同北入橫雲小橫
二山間至機山南別爲秀溪塘西入竹管涇至
干山北別爲察樹涇東流入柘澤塘合其西亦
入竹管涇合爲曹港

秦皇走馬塘 自圓泖來東行至橫雲山前爲
橫山塘東絕沈涇塘爲橫浦經富林市南連接
丘涇八曲諸水東行七里涇入顧會浦今俗止
稱走馬塘從簡也

沈涇塘 府西五里南接秀州塘過秀野橋北
行又西爲黃泥漕爲浪墩涇東爲沈村涇又北
爲褚庵港至富林西合橫山塘東合橫浦北流
爲神山塘又東北爲百曲港自富林西北入鍾
賈山北行至永安橋爲柘澤塘入大盈浦自嘉
興城下水東北流此塘所以泄上流之水也歲
旱浚之亦可引松江水以資灌溉其一支西行
循干山南麓而西者曰橫浦塘櫻珠灣在焉過
山涇爲秀溪塘西入於葑澳

秀州塘 在府西南俗呼為官塘源出杭州西湖歷嘉興而東至風涇鎮入界由鎮而東過白牛塘絕長泖北流合滕港又合黃門橋合斜塘過李塔匯石湖塘過吉陽匯合古浦塘東流入市為沈涇塘過小清河至平政橋入西水門與舊西湖日月河諸水合出東門與俞塘諸水合循西城而南合張涇米市塘入官紹塘北過採花涇東北合顧會浦自萬安橋東流為朱涇自斜塘東流入潢潦涇為黃浦自李塔匯東流為

南錢塘為風涇為界涇為橫泖

黃橋門 水自大泖來入秀州塘舊於此植木

為水竇七十餘以泄泖水斜入橫潦涇其勢甚

速今塞西有六百畝蕩

斜塘 水自大泖來水極湍悍東入橫潦涇自

黃橋門塞水併入此塘故其勢益悍

石湖塘 水出泖合秀州塘北流其上為北錢

村市

古浦塘 水自圓泖來行二十七里歷東西山

涇出跨塘橋與秀州塘合

尤墩港 陸家浜 並南通古浦塘北通浪

墩涇

褚庵港 自沈涇分支東流有丘涇自白龍潭

來會之貫穿陳沈村周家草諸聚落間其南連

採花涇東入顧會浦其入處曰二里涇其旁近

曰練家浜黃家浜沈家浜大塔浜金家浜浦家

浜

神山塘 水北流至佘山西入諸家塘百曲港

自神山塘分支東北行爲黃蠻涇一水出神山

塘循佘山南麓來會之並入顧會浦

朱涇 在郡西南二十七里承嘉善平湖長泖

諸水貫市橋東流水勢湍悍絕驅塘至張涇東

爲橫涇又東爲蕩涇其北流者入於橫潦涇當

市橋回折處日落照灣俗呼赤日灣唐船子和

尚行化處也

橫潦涇 卽潦涇黃浦之首也楚黃歇所開今

東江注焉西起秀州塘東入上海界

小橫潦涇 西引秀州塘水東南入於黃浦
南錢塘 一作南錢港源於秀州塘自李塔匯
分派而東散行村落間爲呂巷港出秀南橋爲
蔣涇東匯爲莊港入北爲斜涇過超果寺與瑁
湖南口合東入城河與張涇合南入於黃浦
黃泥漕 在沈涇塘之西其北爲浪墩港又北
爲褚庵港東爲二里涇南接採花涇
界涇 在府西南平湖縣之北境東直胥浦塘
北爲大茫塘爲麪丈港爲東西徐涇爲洋涇爲

游涇爲北諸港爲梅林涇蔣巷港莊公塘西爲
野民涇北通秀州塘東南橫柳

東橫柳 其源自當湖長柳來界平湖華亭間
其支流爲華家涇丁家漾爲柳港其東爲秋涇
白涇經秦山塘南復東北流由周倉浜入沈涇
一支東北流爲惠高涇爲彭港其東爲朱家漚
北爲處士涇又北爲謝墳涇爲西帆涇東帆涇
北爲胥浦塘又北爲石白浦遂北入瀝瀆塘
瀝瀆塘 一名璜溪亦自長柳來東行過惠高

涇彭巷港處士涇西帆涇又東過東帆涇北入於西浦謝墳東南為丘涇其南為白涇又東為山涇東帆之東為橫涇東入石白浦

胥浦塘 相傳吳子胥所鑿自長泖接界涇東盡納惠高彭巷處士瀝瀆諸水絕石白浦至張

涇東為前岡塘其北流絕歸涇出朱涇鎮西為徐涇出鎮東為驅塘出太平寺東為掘撻涇

歸涇 在胥浦北亦自長泖來西接大茫塘東流絕徐涇驅塘東為橫塘至張涇東為後岡塘

南有水五岐合流貫徐涇東入掘撻涇曰五丫港入於洙涇一支承褚涇而東至於張涇北逾米涇西徐涇與驅塘東會於橫潦涇

驅塘 自胥浦北流絕五丫港歸涇過朱涇鎮北入潢潦涇

掘撻涇 亦出自胥浦北流至潢潦涇止
白涇 其源自平湖乍浦來惠高彭巷處士諸

涇港皆所自出東南通山涇
山涇 在秦山西其北通石白浦由秦山北轉

東為新河東北為落河潭北為沈涇為曹涇為褚涇北入於干巷港

石臼浦 接山涇北流為曹港為前鳳涇為東松浜西松浜絕胥浦入潢潦涇東松之北為蔣松涇東與張涇合蔣松北絕橫塘入市涇者曰小張涇其東南為新運鹽河

三汊河 在金山營西三里其源自平湖界新倉秦望山諸草蕩來其地涸燥北引張堰潮水以資灌溉明萬曆中重浚

欽定古今圖書集成方輿彙編職方典

第六百九十卷目錄

松江府部彙考二

松江府山川考二 水利附

松江府城池考

職方典第六百九十卷

松江府部彙考二

松江府山川考二

府志

上海縣 無山

黃浦 在郡南境即古之東江乃禹貢三江之一也戰國時楚黃歇鑿其旁支流後與江合土人相傳稱為黃浦又以歇故或稱春申浦為南境巨川其首曰潢潦涇受黃橋斜塘及秀州塘水東流至詹家匯為瓜涇塘凡南北兩涯之水

皆入焉至鄒家寺折而北流趨上海縣東西兩
涯之水皆入焉東北會吳淞江以入於海瓜涇
塘有東西二渡入上海界有黃浦渡高昌渡
滬瀆江 在縣北一十里吳郡記曰松江東瀉
海曰滬海亦謂之滬瀆凡水發源而注海曰瀆
吳之滬瀆是也晉史虞潭爲吳國內史修滬瀆
壘以防海寇通鑑晉隆安二年吳國內史袁崧
築滬瀆以防孫恩後竟死於是寰宇記云袁崧
城在滬瀆江上舊有東西二城其旁爲蘆子渡

俗呼蘆子城東城廣萬餘步有四門元時徙于
江中餘西南一角西城極小在東城西北兩傍
有東西蘆浦永樂大典云江側有滬瀆壘今考
其地吳淞江直趨而東又七十餘里入海無復
有瀆兩岸皆平疇茂林故壘寂然其東西蘆浦
亦止通潮汐而已

金匯塘 在十六保從令涇之東其南接和尚
塘北流過金匯橋西折爲倪家灣北爲岡涇塘
入浦其支渠著者曰百曲港

駟馬塘 紫岡塘 在十八保並在盤龍塘東其北通六磊塘至橫塘止紫岡之西爲沙岡東爲竹岡爲橫灤爲新涇並見前通江諸浦下新涇之南古鶯竇湖也

六磊塘 在十八保自盤龍分支東流爲車溝東北爲新村塘爲吳店塘其北爲夏家浜東流爲廟涇爲新港爲烏泥涇東南爲華漕港北爲八尺港並入於黃浦明萬曆中重浚今淤烏泥涇 在二十六保其上有鎮北爲鄭家漕

爲曹胡涇爲灌涇日赤浜陸家浜薛家浜徐家浜肇嘉浜坊浜侯家浜南楊涇北楊涇疇溝浦並入於黃浦坊浜肇嘉之間爲上海縣治經縣而東爲下海浦曲浦楊樹浦尹祥浦

鶯竇湖 在二十一保續志云已廢按顧彙志在上海西南五十五里週五里舊有邢竇二姓居此故名今已淤塞訛爲櫻桃匯又按蔣叅議性中墓誌所居側近鶯脰湖往來病涉蔣以縣官立坊物作橋濟之是湖雖淤塞而故道猶存

也據蔣宅在新涇南故書於此

蒲匯塘 在十八保西受盤龍泗涇橫泖等水
東流過沙竹岡橫灤諸水竹岡橫灤之間為七
寶鎮又東行為龍華港由龍華港入於黃浦明
萬曆崇禎時屢經疏濬其東分一支上海縣城
者曰新港按縣志東出龍華在上海之西華亭
之東北黃浦之正西三縣於此分界

龍華港 在二十四保接蒲匯東流過漁水窪
東西上澳東南至百婆橋入於黃浦故亦名百

婆塘見顧彘上海志今呼百步塘自葑澳塘至
此為泖東郡北東流之水

許浦 在三十保南通橫灤北入於江

魚浦 郭巷浦 舊志列許浦後

新涇 在二十九保橫灤東古名新涇浦北通

松江按縣志浦支渠東有石橋浜周家浜菖蒲

涇野奴涇彭家浜橫清涇交紋涇漁水窪劉家

浜蕭師浜西有陶涇師家浜陸家浜五漕金家

浜上江涇唐子涇橫涇皆支通浦水以灌田疇

其東為上澳新涇南通蒲匯塘而北入於江

西上澳浦 東上澳浦 俱在二十六保並

南通烏泥涇東通黃浦北入松江

西蘆浦 大蘆浦 俱在二十七保今名蘆

子浦並北入松江中有沸井古於此置渡後飛

梁南北人呼為江橋今廢

上海浦 即黃浦下流合江處

范家浜 即上海東大黃浦明夏忠靖所開

南踰浦 在二十二保按顧或志在上海東北

三十六里其支流為東溝浦西溝浦馬家浜今

縣東北有水曰踰港曰大踰浜其南近都臺浦

疑即南踰浦之故跡也

都臺浦 在二十保鹽塘東故曹家溝也明天

順中所濬上有行臺因名綿互五十餘里年久

淤塞萬曆七年大加疏浚東北為連家漕北為

水仙塘為郁家港為官路港為邵瀝港並西通

鹽塘邵瀝之東為翁家港北為陶河港並東通

運鹽河通江諸浦舊圖經以趙屯大盈顧會崧

子盤龍爲五大浦五浦之中趙屯大盈皆直受
澱山湖水趙屯迤西爲白鶴江大盈迤東爲青
龍江昔人論湖水下流必由白鶴匯以達於江
又謂由青龍江入海今白鶴青龍雖以江名僅
同溝澮顧會盤龍從府城來絕橫塘入泖
語兒涇 在十六保沙竹岡之西與上海分界
東卽紫岡又東爲韓倉港姚港南通黃浦
閘港 在十九保自新塲西流入黃浦其入處
乃浦之折而北行處新塲之東去海不遠故論

者指此爲東江入海之故道按東江入海故道
以形勢論之當是柘湖海口然志所載有水利
圖可據未敢以爲非也兩存之以備參考
馬路浦 在十九保新塲鎮北一支自東南起
中前所至倪家行而入一支自東北連一竈港
亦自倪家行入西流絕鶴沙塘而南過石角倉
踰新閘沿三十里絕青村運河出閘港舊止築
堤壅水以資灌溉稍旱則涸明正德中民倪升
遠盛鶴鳴等相繼開浚遂爲通渠

下沙浦 舊亦名鹽鐵塘世傳吳越王爲此以
運鹽鐵因名宋紹興間開港浦一十八處鹽商
舟楫往來交通改名曰浦自浦北流爲鹽塘鹽
塘之東爲都臺浦又其東卽運鹽河
鹽塘在十九保自下沙場北流絕沈莊周浦
三林諸塘通中新河橫眠港西入黃淄漚三林
之北爲北鹽塘又北爲曲鹽塘
沈莊塘 在十九保下沙浦北其東通連家漕
南折爲鶴坡塘並西入黃浦

周浦塘 一名杜浦東通水仙塘西流入浦按
縣志在十七保明季淤成平陸

皇清順治五年里民顧君陶捐資開濬至今利涉

三林塘 在二十四保周浦北自鹽塘西流其
南爲橫裊涇其北爲杜婆涇西入黃浦

楊淄港 在二十四保三林塘北自北鹽塘西
流入於黃浦

黃淄漚 在二十四保楊淄漚北與白蓮涇合
南爲中汾涇

馬家浜 南通都臺等浦西入吳淞江東北至界浜與嘉定分界有寶鎮堡在焉

東溝浦 西溝浦 俱在二十二保按縣志

下沙浦與鹽鐵塘各為一水其南有新港又有

孔家浜急水港顧家浜王家浜四水黃淄漚之

北有白蓮涇唐子涇蟹漚俞家浜華曹港楊涇

一作洋涇范家浜新志多闕按新志有東奚浦

楊木浦下海浦江苧浦椿樹浦皆云在高昌鄉

而舊志不載水道之改易多矣如都臺浦乃曹

家溝之易名黃浦乃范家浜之故道東溝馬家

浜本南踰浦支渠其勢俱大而南踰反微矣吳

淞江迤西北之水有牧瀆港桃樹浦盧浦俱北

通真如徐公港俞家港沙浜俱北通江灣下海

浦曲浦楊樹浦尹祥浦並北通舊江而舊江及

江灣浦皆引西水東入吳淞江明萬曆中曾次

第疏治然潮泥易淤時宜查濬自運鹽河至此

為下沙以北西流入浦之水

張涇 在二十九保自府南張堰鎮之西接新

運鹽河北行從詹家匯出瓜涇塘遂絕而北流
為駱家浜為鶴塘涇為蘆涇東北與米市塘合
折而北行至張涇橋與城河合續志云張涇起
南門太平柵至張堰長六十三里今城內太平
橋與張涇南北相望古未有城故為柵云
沙岡 在十六保黃浦入松江承浦水入南塘
橋抵柵林至捍海塘止明萬曆七年重浚西通
巨漕東接竹岡
竹岡塘 在十六保沙岡東首尾延亘如一至

蒲匯塘而北別名為小菜圃

橫灤塘 一作橫瀝在竹岡東其南通黃浦中

通蒲匯塘北絕淞江入嘉定界踰太倉

青浦縣

鍾賈山 在干山之東與廬山對峙周三里高

二十丈相傳以鍾賈二姓得名或以介九峯間

故名中介山山之陽有玉清觀壽安寺內有棲

雲樓半雲亭心遠堂皆名蹟寺西陳氏墓垂絲

檜二株徑幾五尺蓋數百年物也郡守熊軫峯

題曰嘉樹林楊樞鍾氏譜叙云九峯之間有儒者曰鍾子鳴其先與賈姓同隱於壽安山中時人遂以鍾賈名其山鍾氏世居茲山之陽自唐以來六百有餘歲矣

澱山 在府城西北六十里機山西北周三百五十步高三十丈舊志云在薛澱湖中今湖四面皆為圩田山在平陸矣山形四出如鰲上建浮圖下有龍洞云通太湖山屹立湖中亦落星浮玉之類旁有小山初年僅兩席許久之寢長

寺僧築亭其上榜曰明極曰鰲峯塔今寺法堂地曰龍淵橋曰潛龍洞曰通靈泉橋在山陽洞在山陰泉在山巔宋慧燈禪師鑿石十六丈得此初名寒穴曰回經石相傳有僧西域取經回過湖漂水墮此石上石在山麓洞西曰白蓮池在小山下與洞吞吐曰三姑祠在寺旁曰一色軒曰徹見閣在法堂後并明極為十景云今山在平田去湖益遠亭宇塔院僅存數棟矣有禪寺曰普光王寺昔在薛澱湖中有道人登禪師

者始結屋於山崑之西面多漁家自師結庵以
來居人採捕竟日不得魚因就師問其故師曰
但以爾舟載土詣吾山者當遂所願也既而果
然自爾遠近歸之積累既久因以建寺名普光
王寺嘗因浮圖放光故爲塔神名號在宋朝有
勅封伽藍神又西北一小山山皆石骨名曰箕
山

橫雲山 在崑山東北本名橫山天寶六年易
今名或云以陸士龍名也其巔有白龍洞潛通

澱湖深不可測下有祭龍壇歲旱禱焉宋皇祐
中浙西旱蝗華亭令吳及禱於此立致甘澍蝗
不入境今山陽採石闕然成窪如失面目近歲
府同知張什下令禁之然山民力田不給以石
爲生未能止也按山中古塚纍纍世傳以爲多
晉陸氏所葬元至正二十四年有封姓者發一
塚磚上有太元二年造五字按太元乃東晉武
帝時計九百十餘年矣塚中得古銅器二百餘
內一水滴長五寸高四寸作獅子昂首軒尾走

躍狀一人面部方大髭髯飄蕭騎獅子背左手持無底圓桶右手臂鷹腦心爲竅以安吸子吸子圓頂正蓋腦心儼一席帽其人衣摺及獅鷹毛羽種種備具通身青綠吸子渾若碧玉其製作非晉人所及知爲漢器無疑或卽陸氏所殉葬也

小橫山 在橫雲東中限一水隆然而興上多瑩石多萬年松俗呼仙人澆酒石由絕頂至東北皆峯巒隱起壁立數仞色盡赭遊人呼爲小

赤壁盡壁斬然一罅如虎丘試劍石狀前有石可踞而坐小澗亦九峯奇絕處也山之麓有小山招隱元孫稷所居又傳有僊雲館疑翠軒爲蘇東坡遊賞處今無跡矣

廬山 在沈涇塘東疑亦以盧姓得名頽然一丘叅峙於干將鍾賈間環絡蒼翠不覺其孤山下有水一泓清澈如泉當華青孔道明萬曆時僧慧解蓮儒建甘露亭隨時施茗飲薑湯風雨之夕或施燈火行人便之元至正間有龍見於

廬山雲霧蒼鬱鱗爪分明從西北入於泚澱明
萬曆二十五年五月間蛟起廬山崩西南一角
細林山 在廬山南舊名神山唐天寶間易稱
細林山元時僊人彭素雲遍遊名山至武當遇
張真人於紫霄宮素雲執廚汲水苦行三年得
受接神煉氣之旨明洪武十四年至此居焉二
十七年八月旦起沐浴更衣趺坐而逝七日顏
色如生又舊有神龕僊館四字是呂純陽書筆
法奇異嘉靖間爲太守吳黃州取去有元旌義

士夏椿墓上有石碑有素翁仙塚有石洞雲出
其中有崇真道院及晚香亭今廢萬曆時郡人
張之象於道院側創四祠祀張季鷹陸士衡士
龍顧野王按梁簡文帝有神山銘其序曰神山
本名秀林山則秀林乃此舊名也

佘山 在縣城南十八里廬山東北由神山塘
折而東舊有佘姓者養道於此故名按吳興志
亦有佘山上有東漢佘將軍廟好事者遂指此
爲東佘云其高與干山等東西二峯延亙數里

招提蘭若隱見其中望之穠郁深秀遠近皆宜
惟自富林八曲以入盡得其勝土宜茶有泉名
洗心甚清冽雲間通志云佘山高八十丈周一
十八里上有三庵中為靈峯庵今昭慶慧日兩
寺西庵今宣妙寺東庵今普照寺有秀道者塔
有山月軒有金沙地芥子庵有虎樹亭東山多
奇石明徵士陳眉公隱於此自名其居為神清
之室為頑仙廬其上為高齋折而北為清微亭
亭之下為水邊林下水石俱勝今漸蕪沒矣

薛山 在佘山東中限一水吳地記昔薛道約
居此因名山下嘗掘地得石誌曰玉屏山形亦
肖故又稱玉屏山下有羅池產藕甚佳今涸
鳳凰山 在城東南二十五里圖經云以其據
九峯之首延頸舒翼宛若鳳翥故名東枕通波
西連玉屏山形修峻孤起無附陟半嶺則外山
拱揖如奧區焉左有青壁高數十仞如削成其
上有虬松古藤蒼森可愛有二泉曰鳳凰曰陸
寶故陶九成有丹泉陸寶祕精靈之句衛宗武

秋聲集云吾郡諸山以杭天目爲祖鳳凰東飛
來自虎林虎林有鳳凰山故以雲間爲小鳳
庫公山 在鳳凰山南與陸寶山隔溪相對昔
有庫公隱此故名周一里高七丈實鳳山之附
庸也土宜益盎可栽蘭竹

陸寶山 在鳳凰山旁與庫公山對峙本陸氏
家山介鳳凰玉屏之間山多土少石而土又美
人爭取之今已爲平陸

簞山 在鳳凰山北顧會浦東周三里高五十

丈上海之境自此始嘉禾志作竹簞俗呼北簞
因干山在南又訛爲北干舊云土宜美箭故名
或傳產鐵今皆無有東鄙壁內一石中斷相傳
爲干將試劍石山有玉寶泉甚寒冽有雨華洞
宋張頭陀隱居於此元時遊人猶訪之今塞元
有余瑾亦居此山自號笥隱生幼夢掘地得大
小墨數百笏遂善屬文故又名笥山

福泉山 在簞山北周二里高五丈下皆黃土
初因其形似號覆船後以井泉甘美易今名隆

然而起僅十餘畝殆古所謂息壤也又北為駱駝墩亦以形似而名又稱為落彈墩古有道者薛冷雲嘗居此又名薛道山

酒瓶山 在青龍鎮相傳宋韓世忠以酒勞軍瓶積成山遺址尚存

薛澱湖 一名澱山湖以中有澱山也其源自長洲白蜆江經急水港而來周圍幾二百里實古來鍾水之地北由趙屯浦東由大盈浦瀉於松江東南由爛路港以入三泖舊志云西有小

湖又云縣西北有白蜆馬騰谷瑋瑁四湖且謂白蜆越在長洲馬騰谷瑋瑁三湖相去僅五七里而澱湖茫然一壑不復可辨其後又載錡湖云有陸錡宅曰瑁湖曰邢湖曰新湖皆在西北以今考之澱湖之南有瓢湖其旁有金銀東清東白西陳大葑諸蕩漾北即蔓萊洲在長洲縣界皆涵浸相屬數十里其西過金澤又有西龍蕩雪落漾諸水而不得其名者尚多澱山宋時在水心並湖以北中為一澳曰山門溜東西五

六里南北七八里正當湖流之衝山門溜之中
又有斜路港斜路今與崑山縣磧澳鄰大石浦
小石浦通洩湖流後潮沙淤澱漸成圍田元初
湖去西北已五里餘今趙屯大盈去湖益遠顧
由何家港及南北曹港受湖水以泄於江水患
之多蓋有由矣每歲湖人以湖水清渾辨歲之
豐凶或清或渾或清渾析清豐渾凶析亦從之
按縣志上流勢緩潮沙日積以注湖內漸淤澱
故湖以澱名

白鶴江 古稱白鶴匯自此至蟠龍環曲爲匯
水行迂滯溢而爲災宋嘉祐間自其北開爲直
江徑瀉震澤之水東注於海吳中得免水患今
江蓋故匯遺跡雖以江名僅同溝澮而已其南
爲西霞浦俱東入大盈與青龍江斜對

青龍江 上接龍江下通滬瀆圖經云昔孫權
造青龍戰艦於此故名唐宋時其上爲巨鎮今
鎮爲丘墟江亦阻溢其上流西接大盈東接顧
會下流合浦家江西爲趙浦趙浦在青龍江北

越吳淞江入嘉定界此開江取直分屬於南之
驗也蔣浦亦然自宋以前浩瀚無涯韓世忠拒
兀术於秀州以前軍駐青龍中軍駐江灣後軍
駐海口卽此地也其上置市舶司設鎮學海舶
百貨交集梵宇亭臺極其壯麗龍舟水嬉冠於
江南論者比之杭州明嘉靖時曾建青浦縣於
故址之西今猶稱舊青浦云

趙屯浦 在縣西北三十里澱山湖北舊直受
湖水瀉於松江其闊至五十丈通江五大浦之

一也今自北曹港分支北流愈北愈隘浦口東
以石梁僅通舟楫而已其接曹港處又名新河
東南流入曹港者曰南小趙屯浦東北流入江
者曰北小趙屯浦南趙屯亦名李墟涇其北爲
望湖涇西爲烏菡塘望湖之北爲孔宅涇又北
爲蘇溝並西通趙屯東入大盈浦趙屯之西爲
內助會仙二浦蘇溝之北爲直盧古盤諸浦
內助浦 其上流曰古塘西爲石浦入崑山界
會仙浦 卽內助之分支王可交遇仙處也

直浦

盧浦

古益浦今名古盤浦

南澥浦

梁紇浦

五浦並自蘇溝左右分

流入江

大盈浦

在府城西北七十里澱山湖東舊亦

直受湖水自白鶴匯以達於江闊三十丈今起自南曹港口北接利濟橋至唐行鎮絕橫泖與北曹港合歷塘行倉郭家窰杜村至大盈橋過青龍江又過白鶴匯北入於松江利濟橋之南爲柘澤塘沈涇塘之下流也

顧會浦

在大盈之東自通坡塘出府城北流

爲五里塘又北爲祥澤塘遂別爲崧子浦北出

鳳凰橋絕橫泖至崧山入上海界又北通新江

塘西合青龍江東接艾祈浦以入松江按宋章

峴記云華亭縣西北六十里趨青江鎮浦曰顧

會南通漕渠下達松江舟艤去來實爲衝要自

崧山之陽地形中阜積淤不決漸與岸等每信

潮吐納纔及半道而止垂三十年又按圖經縣

管塘浦大者五顧會是其一而崧塘源與顧會

合俱支流股引環積民壤則顧會之關大矣

艾祈浦 在青龍鎮盤龍塘之間

朱聖浦 舊志列艾祈浦後

崧子浦 舊名崧塘自顧會浦分流下注舊江

口舊圖經崧子浦在縣東北五十里崧子塘在縣北十五里蓋北十五里者崧子浦南口自顧會分流處東北五十里者入江處也與顧會浦同流異派皆瀉水於松江焉

淮浦 華潮浦 舊志列崧子浦後

赤眼浦 一名赤鴈在崧子浦西

西舊江 嚴倘浦 周涇 俱在赤雁浦

盤龍浦 在崧子浦東其上流曰盤龍塘自府

城東三里華陽橋北流過六磊塘過泗涇又過

蒲匯塘遵朱坊橋以入松江長八十里其入江

處曰盤龍匯介華亭崑山之間步其徑纔十許

里而洄沆迂緩逾四十里如龍之蟠故名朱寶

元中葉清臣疏爲新渠道直流速水用無滯嘉

祐之間白鶴匯祖其法也按明一統志盤龍浦

自上海縣西達於江每歲大雨泛溢爲民病宋乾興間范仲淹守平江嘗經度之

北曹港 在縣西南與崑山分界西接踰開河東行過縣城入橫泖一支北折爲新河入大趙屯浦一支出北水關入大盈浦北曹港自澱湖東北行北爲新河入趙屯浦東入大盈浦又東南爲橫泖其西爲三分蕩在崑山界自蕩而東至西虹橋皆宏闊迅駛湖水之泄瀉賴有此耳瀕港田最下北岸有白灤南有叢基浜相傳湖

人於此爲叢取魚則湖化爲田多矣有琴村阮村琴阮諸村田復高秋可種麥

南曹港 卽舊鹹魚港自澱湖東南何家港東流納龍河水東北爲斜瀝入北曹港東出泰來橋折北爲大盈浦南接柘澤東爲諸家塘港上有曹宣慰宅南北曹港疑以其姓得名

泗涇 在縣東三十七里自祥澤塘折北而東納通波涇外波涇洞涇張涇四水故名東合蟠龍塘北行折而東爲蒲匯塘元初水盛於橫塘

至正間潮徙而南涇面廣三十丈深二丈延袤九里爲水道之要今自此至蒲匯塘皆淤淺稍旱可揭而涉天台陶宗儀南村草堂在焉

爛路港 在澱山湖東南引湖水南行入於泖東爲山涇港西爲金林蕩爲金同路蔣家路爛路之西爲連湖蕩金同之西爲鄒家蕩水勢迅駛四縣漕舟所由也

橫泖 自北曹港分支經唐行鎮絕大盈浦東流過崧宅塘絕顧會崧子二浦東接胡涇爲東

橫泖南至樓下張管山前有樓無山有張管山庵爲橫塘望龍歸庵斜入盤龍浦遂東貫沙竹岡塘止西上澳明萬曆八年疏浚爲潘蕩崧宅低鄉洩水之經道按縣志其源自當湖長泖來其支流爲華家涇丁家洋泖港其東爲秋涇

崧宅塘 自橫泖分支北來西折爲界涇爲孔涇俗呼林道浜北爲七匯港爲秋末涇爲篠涇西對望湖涇東通郊店楊家莊烏塘細流百折至嘉定紀王廟鎮過江爲楊林與江灣真如南

翔婁塘諸鎮接跡江灣以下皆嘉定地界產蘿
菘薯蕷黃麻藍靛之類嘉湖賈販者多從此道
以避江湖之險然皆淤淺稍旱則舟楫不前此
濱江諸浦之通患也

諸家塘 由柘澤東流歷天聖莊爲潘蕩抵陳
坊橋納神山塘水歷佘山之陰益清駛寬廣經
柘溪塘入顧會浦又折而北入橫泖自神山塘
分支東北行爲八曲港爲印涇干步涇苧墩涇
自北曹港至此爲湖東郡北諸浦上流之水

谷水 一名谷泖一名華亭谷水極清冷吳地

記海鹽縣東北二百里長谷陸遜陸凱居此
水東二里有崑山其父祖葬焉陸機詩髣髴谷
水陽婉變崑山陰則此水在崑山之北寰宇記
華亭谷水下通松江水經松江東南行七十里
入小湖自湖東南出謂之谷水南接三泖士衡
詩所云卽此水也方輿勝覽谷水出吳小湖經
由拳故城下則谷水在長泖北屬青浦而遜凱
士衡所居亦在是矣神異傳由拳秦長水縣後

陷爲谷水云按明一統志谷水出鱸魚萆菜
急水港 在縣西南五十里長二十餘里闊處
至三十丈西接吳江白蜆江乃東江之上流也
金澤塘 在澱山湖西南東南流入泖其西爲
西龍蕩與吳江縣分界東爲東清漾西北爲周
莊北爲甫里屬長洲界

章練塘 在金澤南其源出陳湖東流入泖其
入處與泖塔對其一支東南流入泖者曰曹墳
港南爲濮陽塘又南小貞大貞二塘其西通白

牛塘東入泖北爲毛練蕩王家涇

濮陽塘 在章練南其東北由大蒸入泖上有
濮陽王廟

小蒸塘 大蒸塘 並在濮陽南其西通白

牛塘東入於泖北爲毛練白蕩爲王家涇其地
有古濮陽王墓元嚴陵邵桂子別業在焉按濮
陽王墓蒸土爲之其地因有大蒸小蒸之名

白牛塘 其源自當湖來過雪水涇至楓涇過
潛鳳橋又過牛滑橋北流入長洲界茱萸港在

其東自谷水至此為三泖西界之水

葑澳塘 在三泖東其南連走馬塘北通南曹

港其西一支為龍河龍河之西即澱山也

水利附 府縣志合載

上海縣 按華亭婁縣無考

將軍堰 晉左將軍袁崧所築因以為名按明

一統志在府城東北三十五里

薛家浜石閘 在小南門外明萬曆二年建

日赤港石閘 在西城外六里許明萬曆十三

年本府通判鄒志學知縣顏洪範築

龍華石閘 在龍華江內明萬曆年間知縣劉

一曠用徐伯光啓議築陳所蘊有記今廢

郎官橋堰 在肇家浜因浦近城故築

吳淞江新石閘 在北門外吳淞江二壩

皇清康熙十一年蘇松常道韓佐周築

護塘 沿塘舊有遺址明成化七年海泛溢九

年巡撫都御史畢亨巡按御史鄭銘督水僉事

吳瑄交檄府縣修築西接華亭東北抵嘉定凡

長一萬七千七百四十八丈歲久傾頽修葺不
時嘉靖二十二年太學生喬鏜捐貲倡修兩月
訖工凡九十里開竇八處民甚利之

備塘 在護塘外自南起至北止長九千二百
五十丈五尺萬曆十二年知縣鄧炳起工至十
三年工始成

青浦縣

捍患隄 在海隅鄉邑之西郊地勢卑窪又濱
於湖故恆有水患明弘治七年知縣董鑰請於

撫按官乃築此堤延委百餘里錢福有記

吳淞江閘 宋大觀三年兩浙鹽司請開淘松
江復置十二牖元大德九年江水湮塞任仁發
請疏之特命平章董濬鑿之役復置閘竇啓閉
以時

松江府城池考

府志

本府 華亭縣婁縣附郭

松江府城池 廣袤凡九里一百七十三步高

丈有八尺壕廣十丈深七尺門凡四東曰披雲

西曰谷陽南曰集仙北曰通波水門各附其旁

門有樓樓外為月城元末張士誠據吳時築明

洪武三十年因而葺之立松江守禦千戶所專

管守護城池上建敵臺二十座窩鋪二十六座

雉堞三千三百八十九梁其地後殿九峯前襟

黃浦大海環其東南三江繞乎西北平疇沃野
四望極目東南之重地也嘉靖間島賊入寇知
府方廉捐俸增葺萬曆二十三年華亭令王廷
錫葺治旋崩二十六年巡撫趙可懷檄令重繕
高闊並加五尺外壕深廣皆濬治如初萬曆三
十六年傾於積雨凡數百尺華亭令聶紹昌修
築崇禎三年郡守方岳貢修葺增高城堞修建
窩鋪敵臺各置軍兵防宿編號分明遞籌擊柝
城樓四座東曰迎生西曰寶成南曰阜民北曰

拱宸

皇清康熙二年秋霖兼旬城西南隅當大張涇衝齧
之處咸遭傾圮他處亦多崩損提督梁化鳳巡
撫韓世琦捐俸修葺於是通加浚築向來城堞
併三為一共一千二百有奇凡水關城樓之屬
煥然重新雄峙一方遂為巨鎮

外縣

上海縣城池 周圍凡九里高二丈四尺門大
小凡六東曰朝宗南曰跨龍西曰儀鳳北曰晏

海小東門曰寶帶小南門曰朝陽水門三其東西者跨肇嘉浜其在小東門者跨方浜城有敵樓一平臺二堞二千六百有奇穿廊七十有八壕廣六丈深一丈七尺周迴濼繞外通潮汐明嘉靖三十二年知府方廉因倭亂築濬三十六年同知羅拱辰於城四門益以敵樓三楹沿城益以箭臺二十環壕益以土牆又於要害處益以高臺層樓其名凡三曰萬軍曰制勝曰鎮武萬曆二十六年知縣許汝魁加高五尺開小南

門水關引薛家浜水以通市河南城居民至今賴焉後知縣徐可求劉一爨相繼甃內城加闊自大南門迄北門俱甃以巨石凡十餘年而告成三十六年久雨內城傾數十處知縣李繼周次第修築四十六年增置穿廊八十餘間

青浦縣城池 周圍一千三十丈以里計者六高二丈三尺箭梁一千七百一十五敵臺七窩鋪四十八門樓六旱門五東曰望海南曰觀寧小西曰來蘇大西曰永保北曰拱宸水關三南

曰躍龍北曰充賦大西曰通漕月城三在南北
大西餘未建壕廣三丈深一丈周圍八里明萬
曆二年知縣石繼芳創建嘉靖庚子以糧稅無
徵議建於郡之西北離城七十餘里地名青龍
歷知縣楊垚呂調陰幾十年值徐文貞入相有
稱不便者壬子議廢又二十年而少司馬蔡汝
賢時為給諫疏議復之蔡即其邑庠生也萬曆
元年移建於唐行鎮凡城池縣宇及學宮察院
倉儲之屬皆邑令石鼎建三十五年知縣卓鈿

增修城梁重建敵樓崇禎間知縣吳之琦署篆

同知趙元會前後修城浚壕按松屬衛鎮諸城俱附於後

金山衛城池 在府南七十二里西連乍浦東

接青村周圍一十二里三百步有奇高二丈八

尺壕周於城深丈有八尺面廣十二丈陸門四

水門一門樓四南曰鎮海北曰拱北角樓四腰

樓八敵臺八間以箭樓凡四十八雉堞三千六

百七十八其外營堡烽候氣勢聯絡隱若金湯

明洪武十九年欽差安遠侯等官起嘉湖蘇松

等府衛軍民所築永樂十五年九月欽差都指揮使谷祥增高五尺潮沙淤塞復命指揮侯端等督修挑深一丈四尺闊一十丈

柘林城池 本堡原係古鎮以其臨海明嘉靖甲寅倭至取便結老巢于此巡按御史尚維持因建議築城周圍四里高一丈八尺旱門三座水關二座雉堞一千八百七十垛城壕原未深闊後經巡撫趙可懷復重濬面闊十丈底闊六丈深一丈五尺

青村城池 在府城東一百十里周圍六里高二丈五尺壕廣二十有四丈深七尺餘城門四上各有樓外各有月城角樓四敵臺十一箭樓二十八明洪武十九年安遠侯議築永樂十五年都指揮使谷祥增修城池周圍五里八十步月城四座萬曆二十六年巡撫趙可懷檄委署海防同知李暹重修城加高厚如故壕面浚闊十丈底闊六丈深一丈六尺

南匯嘴城池 在府城東北一百五十里青村

北五十里周圍九里百三十步高二丈二尺壕周於城深七尺餘廣二十有四丈陸門四水門四門樓角樓各四敵臺四箭樓四十明洪武十九年安遠侯築永樂十五年都指揮使谷祥增修弘治初指揮使翁熊重修內有鎮撫司軍器局廣儲倉外有演武場祀典有城隍旗纛二廟其備瞭守瀕海有墩塘三十五墩自一墩至十八墩在捍海塘外每墩一瞭守軍士五人塘一十七即海塘置鋪舍以便瞭守每塘一瞭守軍

士二人萬曆二十六年巡撫趙可懷檄重修城牆高厚如制壕面闊十丈底闊六丈深一丈四尺

川沙城池 在八團鎮明嘉靖三十六年巡撫趙忻巡按尚維持兵備熊桴興築內設守堡千戶公署百戶所軍器庫把總司撫按行臺鐘鼓樓城隍廟社學下沙三場二場鹽課司南踰巡檢司三林莊巡檢司演武場又置附堡營田若干畝除輸糧外餘贍守堡公用邇來生聚日繁

人文漸盛巍然爲瀕海巨鎮

寶山城池 在上海東北與嘉定接壤明末樂初沿海設備築高丘二十丈延亙十里事聞御製文樹碑焉今沒于海舊有旱寨後廢嗣築新城但城隘而兵力單弱萬曆七年撫按議題改築城周三里高丈有八尺以吳淞所官兵聽本府委官統練以備守禦亦海壖一險阨也

西倉城池 在府城西門外周圍二里高一丈八尺陸門凡四壕廣六丈深三尺餘明嘉靖間興築以衛漕糧內有公署神祠倉廩俱萬曆己未知縣章允儒重修崇禎八年知府方岳貢以漕艘運軍泊舟水次恐滋他端遂築敵樓於倉橋北岸增置城樓四座葺城濬河其城中空地許民間納價給帖於是居民鱗比倉廩整翼屹然成一方之鎮

